

All Party Meet

कल्लै थमां शुरु होने आहले संसद दे बरसांती आहले इजलास शा पैहले सरकारै अज्ज सब्भनें पार्टिं दी इक बैठक सद्दी दी ऐ। इस दरान सरकार, संसद दे दौनें सदनें दे कम्मकाज गी बवस्थित ढंगै सिर चलाने दे मकसद कन्नै सब्भनें सियासी पार्टिं दा सैह्योग मंगोग। कल 21 जुलाई थमां शुरु होआ करदा संसद दा बरसांती आहली इजलास 21 अगस्त तोहड़ी जारी रौह्ग। इस इजलास दे दरान दौनें सदनें दिआं कुल 21 बैठकां लग्गडन। इस सरबंध्यै च मीडिया कन्नै गल्लबात करदे होई संसदी मामलें दे मंत्री किरें रिजिजू होरें आखेआ जे सरकार, संसद च पुट्टे जाने आहले सब्भनें महत्वपूर्ण मामलें पर चर्चा लेई पूरी चाल्ली तैयार ऐ।

<><><><><><>

LG-Mahasammelan

लेफ्टिनेंट गवर्नर मनोज सिन्हा होरें आखेआ जे जम्मू-कश्मीर दे हर इक बसनीक दा आतंकमुक्त ते नशामुक्त केंद्र शासित प्रदेश बनाने दा महत्वपूर्ण कर्तव्य ऐ। एल.जी होरें जम्मू च प्रांतीय आर्य महा सम्मेलन च बोलदे होई एह गल्ल आक्खी। उनें भरोसा जताया जे भारत तौले गै विश्व गुरु दे रूप च उभरौग ते स्थाढा महान देश दुनिया आस्तै इक नमें रस्ते दा प्रदर्शन करोग। एल.जी होरें वैदिक ज्ञान च परतियै नमें सिरेआ जान भरने ते इसी स्कूली पाठ्यक्रम च शामिल करने दे महत्व पर जोर दिता तां जे युवा पीढ़ी गी विश्व साहित्य दी महान रचनाएं, स्थाढी परानी सभ्यता दे मुल्लें-आदर्शें ते विज्ञान, कला ते गणित च ज्ञान दा खजाना प्रदान कीता जाई सकै।

<><><><><><>

CS-Vicharnag

मुख्य सचिव अटल डुल्लु होरें श्रीनगर दे नौशैह्ला इलाके च स्थित ऐतिहासिक विचारनाग मंदरै च जारी पुर्ननिर्माण कम्में दा जायजा लैता। इस मंदरै गी विचारनाग साहब दे नांऽ कन्नै बी जानेआ जंदा ऐ ते विरासती थाहें दे रक्ख-रखाऽ सरबंधी सरकार दी पैहलकदमी दे तैह्त्त इस मंदरै दी परानी शान परतियै ब्हाल करने दे कम्में गी तोढ चढेआ जा'रदा ऐ। मुख्य सचिव होरें इस ऐतिहासिक थाहै दे संरक्षण सरबंधी कम्में गी शुरु करोआया ते सदिएं परानी एहदी शान

परतियै ब्हाल करने दे महत्वै पर जोर दित्ता। इस मौके पर मुख सचिव होरें अधिकारिएं गी निर्देश दित्ते जे ओहू कम्में गी बेल्ले सिर तोढ़ चाढ़न ते कम्में गी तोढ़ चाढ़दे बेल्ले गुणवत्ता बक्खी खास ध्यान देन। एहू मंदर जम्मू-कश्मीर दी ऐतिहासिक ते धार्मिक महत्वै आहली इक महत्वपूर्ण थाह ए ते प्रदेश दी सगोसार सांस्कृतिक ते वास्तुकला सरबंधी विरासत दी सांभ-संभाल दे जत्तें दे इक हिस्से दे तौर पर एहदी परानी शान परतियै ब्हाल कीती जा'रदी ऐ।

<><><><><><>

Amarnath-Yatra

अज्ज बडुलै सख्त सुरक्षा बंदोबस्ते हेठ 4 ज्हार 388 जात्रुएं दा इक्क नमा जत्था 179 लोहकी-बड्डी गड्डियें दे काफले च सवार होइये अमरनाथ गुफा दी जात्तरा ताई जम्मू दे भगवती नगर आधार शिविर थमां कश्मीर घाटी लेई रवाना होआ। जत्थे च 3 ज्हार 345 मर्द, 900 महिलां, 13 बच्चे, 100 साधु ते 30 साध्वियां शामिल हियां। इन्दे चा 1 ज्हार 573 जात्तरी बालटाल ते 2 ज्हार 815 पहलगाम आधार शिविर लेई रवाना होए।

<><><><><><>

Bhal Padri Fest Doda

जिला प्रशासन डोडा नै, मती उंचाई पर स्थित भाल पदरी आहले सैल्ले मैदान गी जम्मू-कश्मीर दा अगला बड्डा सैलसफा आकर्षण बनाने लेई कमर कस्सी लैती ऐ ते सैलसफा मैहकमे आसेआ जिला इंतजामिया दे सैह्योग कन्नै भाल पदरी च अज्ज 'भाल पदरी उत्सव' दा आयोजन कीता जा'रदा ऐ। इस दरान उत्थे मस्ती भरोची द्रौड़, पर्यावरण दे अनुकूल सैर, डिक्को लोक नाच, गोजरी लोक गीत, रस्सा-कशी दे मुकाबले ते मुकामी खान-पान दे स्टॉल, आकर्षण दा मुख केन्द्र होइन। फुल्लें दी घाटी खोआने आहली एहू थाहूर्पर अपनी अनोखी खूबसूरती लेई जानी जंदी ऐ। सैलसफा मैहकमे नै सैलानिएं ते मुकामी लोकें गी इस उत्सव च शामिल होने दा साह्वा दित्ता ऐ।

<><><><><><>

Exports-Rise

जम्मू-कश्मीर दे रिवायती दस्तकारी उद्योग गी थ्होए दे जबरदस्त बढ़ावे दे तैह्त्त कश्मीरी दस्तकारी उत्पादें दे निर्यात इस माली ब'रे दी पैहली तिमाही च 309 करोड़ 62 लक्ख रुपें शा उप्पर पुज्जी गे न। पिच्छले ब'रे दी इससै अवधि दे दरान एह् नर्यात 126 करो 90 लक्ख रुपें दे हे ते ऐगती इंदे च 243 फीसद दा बाह्वा दर्ज कीता गेआ ऐ। दस्तकारिएं ते हत्थखड्डिएं सरबन्धी मैह्कमे नै आखेआ ऐ जे पिच्छले च'उं ब'रें दरान कुसै तिमाही च दर्ज कीते गेदे एह् सन्भनें शा मते आंकड़े न ते इस ब'रे ओह् 15 सौ करोड़ रुपें दे लक्ष्य कन्नै अगड़े बधै करदे न। निर्यात कीते गेदे उत्पादें च कानी ते सोज़नी शॉल, कलीन, पेपर माशी ते लकड़ी कन्नै बनाए गेदे उत्पाद मुख् न।

<><><><><><>

HADP-Kishtwar

जम्मू-कश्मीर च राई-बाई दे टिकाउ तौर-तरीकें दे राहें ग्रामीण समुदायें गी सशक्त बनाने दे मकसद कन्नै रम्भे गेदे राई-बाई खेत्तर दे पूरे-पराते विकास सरबन्धी प्रोग्राम - एच.ए.डी.पी. दे तैह्त्त किश्तवाड़ जिले दे रलथाल ग्रांउ च करसानें बड़ी मती कामयाबी हासल कीती ऐ। कलस्टर प्रमुख गुलाम नबी वाणी हुंदी अगुवाई हेठ इलाके दे 50 करसानें, छड़े इक कमांह् रकबे पर 15 क्विंटल जैविक प्हाड़ी थोम दी रड़ कीती ऐ। इनें करसानें च द'उं दिव्यांग करसानें - गुलाम मोहम्मद ते अब्दुल रशीद नै उनेंगी दित्ते गेदे सैह्द्योग ते समर्थन लेई प्रशासन ते राई-बाई मैह्कमे दा धन्नवाद कीता ऐ।

<><><><><><>

India-Pak Match

इंडिया चैंपियन्स ते पाकिस्तान चैंपियन्स बश्कार खेड्डे जाने आहला वर्ल्ड चैंपियनशिप ऑफ लैजेंड्स दा क्रिकेट मैच रह करी दित्ता गेआ ऐ। सीमा पार थमां चलाए जा'रदे आतंकवाद करियै भारत-पाकिस्तान बश्कार बनी दी तनोतनी गी दिखदे होई मैच रह कीता गेआ ऐ। इक बयानै च वर्ल्ड चैंपियनशिप ऑफ लैजेंड्स नै प्रशंसकें दियें भावनाएं गी ठेह पजाने ते भारतीय क्रिकेट लैजेंड्स गी होई दी बेरामी लेई माफी मंगी ऐ। भारत ते पाकिस्तान बश्कार एहू मैच अज्ज बर्मिघम दे एजबेस्टन च होना हा। टिकट खरीदने आहलें गी उंदा पैहा परताने दा बी ऐलान कीता गेआ ऐ।

<><><><><><>